

保定府志

第二十三冊

卷五十七 卷五十八

忠烈

保定府志卷五十七

列傳十

忠烈一

起戰國迄明

周戰國

田光燕之處士爲人智深而勇沈太傅鞠武見田光道太子願圖國事田光曰敬奉教乃造焉坐定左右無人太子避席而請曰燕秦不兩立願先生留意也田光曰臣精已消亡矣雖然光不敢以圖國事所善荊卿可使也卽起趨出太子送至門戒曰丹所報先生所言者國之大事也願先生勿泄也田光俛而笑曰諾僂行見荊卿曰光與子相善燕國莫不知今太子聞光壯盛之時不知無形已不逮也幸而教之曰燕秦不兩立願先生留意也光竊不自外言足下於太子也願足下過太子於宮荆

軻曰謹奉教田光曰吾聞之長者爲行不使人疑之今太子告光曰願先生勿泄是太子疑光也夫爲行而使人疑之非節俠也欲自殺以激荆卿曰願足下急過太子言光已死明不言也因遂自刎而死

史記

按田光故里在今安肅縣北三十里田村

北魏

常世成世爲豪族正光末茹茹寇邊以統軍從鎮將慕容勝與戰大破之時破六汗拔陵作亂欲逼安成不從乃率所部討陵以功授伏波將軍給鼓節後與拔陵戰卒於陣

周書常善傳

按世成高陽人卽今高陽縣也子善有傳見仕績

唐

張興東鹿人長七尺一飯至斗粟肉十斤悍趨而辯爲饒陽裨

將祿山反攻饒陽興嬰城彌年史思明引眾薄城興環甲特陌
刀重五十斤乘城賊將入興一舉刀輒數人死賊皆氣懾城破
思明縛之馬前好謂曰將軍壯士能屈節當受高爵興曰我大
郡將安能委身逆虜今日幸得死然願以一言爲誠思明曰云
何興曰天子遇祿山如父子今乃反大丈夫不能爲國掃除反
爲其下何哉思明曰將軍不觀天道耶今兵趣汝陽天下大定
以徧師叩幽谷守將面縛唐亡固矣興曰桀紂秦隋四海爲怨
故商周漢唐因得代之皇帝無違德祿山非數帝賢是苟延歲
月終卽禽耳思明怒鋸解之至死罵不絕口

新唐書

許遠高陽北新城人

通鑑綱目質實

敬宗曾孫寬厚長者明吏治初客

河西章仇兼瓊辟署劔南府欲以子妻之固辭兼瓊怒以事劾
貶高要尉更赦還會祿山反或薦遠於元宗召拜睢陽太守

新唐

書許遠傳

至德二載祿山死慶緒遣其子尹子琦將兵十餘萬攻睢

陽遠自以材不及告急於巡請稟軍事而居其下遠專治軍糧戰具前此遠將李滔叛入賊大將田秀榮潛與通或以告遠曰晨出戰以碧帽爲識視之如言盡覆其眾還輒曰我誘之也請以精騎往易錦帽遠以告巡巡召登城讓之斬首示賊因出薄戰子琦敗五月賊刈麥乃濟師賊覘城上兵休乃弛備巡使南霽雲射子琦一發中左目賊還七月復圍城初睢陽穀六萬斛可支一歲至是食盡士日賦一勺救兵不至巡士多餓死巡出愛妾乃殺以大饗坐者皆泣遠亦殺奴僮以哺卒至羅雀掘鼠煮鎧弩以食十月賊攻城士病不能戰遂陷與遠俱執子琦乃以刃脅降巡不屈又降霽雲亦不肯降乃與姚閭雷萬春等三十六人遇害子琦議生致一人慶緒所乃送遠洛陽至偃師亦

以不屈死天子下詔贈巡揚州大都督遠荊州大都督霽雲開府儀同三司並寵其子孫大中時圖巡遠霽雲像於凌煙閣

陽至今祠享號雙廟云

新唐書張巡傳

按新唐書許敬宗杭州新城人善心子考隋書善心爲高陽北新城人通鑑綱目質實亦云許敬宗高陽北新城人又云許遠新城人敬宗之孫則許遠爲保定府新城人無疑統志及舊志俱不載而續統志則謂遠爲杭州鹽官人蓋因杭州有許遠墓誤之也今據隋書及綱目質實載入

宋

董元亨深州東鹿人累官至國子博士通判貝州王則據城叛是日冬至元亨方與州將張得一朝謁天慶觀夜漏未盡變起倉猝眾莫知所爲元亨促馬馳還坐廳事賊黨十餘人擐甲露刀排闥而入左右皆奔潰賊脅元亨曰大王遣我來索軍資庫鑰元亨據案叱之曰大王誰也妖賊乃敢弄兵乎我有死耳鑰

不可得也賊將郝用繼來索愈急曰庫帑今日大王所用也可
不上鑰乎元亨厲聲張目罵賊用遂殺之賊爭入攜鑰而去事
聞仁宗曰守法之臣也贈太常少卿錄其子孫三人賊平獲郝
用斬以祭元亨

宋史

元

李齊祁州蒲陰人

元史考異

字公平家甚貧客於江南工辭章元統

元年進士第一歷僉河南淮西廉訪司事移知郵府有政聲至

正十年盜突入府驛取十二馬去齊躬追謝長等殺之十一年

州人秦觀保造兵仗將圖劫掠復獲誅之十三年泰州白駒場

亭民張士誠爲亂破本州淮南行省遣齊往招降被拘久之其

黨自相攻殺始縱齊歸士誠復鼓變殺參知政事趙璉掠官庫

走入得勝湖俄陷興化時左丞契哲篤偕宗王鎮高郵使齊出

守贊社湖齊既出高郵遂陷賊蔓延入寶應會有詔赦叛者至高郵不得入賊給曰必李知府來乃受詔行省強齊往至則下齊獄中齊益辯說士誠本無降意特遷延為繕飭計耳官軍謀知之進攻城士誠呼齊出使跪齊叱曰吾膝如鐵豈肯為賊屈士誠怒扼之跪齊立而詬之乃曳倒搥碎其膝而剛之論者謂大科三魁若台哈布哈沒海上李黼隕九江洎齊之死皆不負

所學云元史

按錢大昕元史考異元統元年進士錄李齊貫保定路祁州蒲陰縣匠戶史作廣平人又按舊志及祁州志名字科分年代俱同今從考異載入

丁好禮字敬可真定蠡州人今蠡縣精律算初試吏於戶部為中

書掾授戶部主事擢江南行臺監察御史復入戶部為員外郎拜監察御史復入戶部為郎中升侍郎除京畿漕運使建議置

司於通州重講究漕運利病著爲成法人皆便之除戶部尙書
時國家多故材用空乏好禮樽節浮費用度賴之以給拜參議
中書省事遷治書侍御史出爲遼陽行省左丞未行留爲樞密
副使至正二十年拜中書參知政事時京師大饑天壽節廟堂
欲用故事大讌會好禮言今民父子有相食者君臣當修省以
弭大患讌會宜減常度不聽乞謝事乃以集賢大學士致仕給
全俸家居庫特穆爾扈饋麥百石不受二十七年復起爲中書
平章政事尋以論議不合謝政去特封趙國公大明兵入京城
或勸往謁主帥好禮叱曰我以小吏致位極品爵上公今老矣
恨無以報國所欠惟一死耳後數日主帥召不肯行昇至齊化
門抗辭不屈死年七十五

元史

按元史本紀考證好禮由集賢大學士爲添設平章非正餘也

明

柳升新城人歷官都督僉事永樂時從張輔征安南論功封安遠伯累加安遠侯阿魯台不奉約束下詔伐之命升將中軍以從宣德二年安南復叛命升討之累捷升勇而輕敵至倒馬坡遇伏兵戰死

舊志

寇深字文淵唐縣人永樂初充郡庠生上書言時務升補大學生偕中官陳保孫勘山東軍需錢穀歷三年始還積弊一清宣德初擢刑部主事遷員外郎善決疑獄有神明稱正統甲子授山西按察司副使時天久不雨詔錄所屬重囚得情可疑者五十餘人悉奏釋之又上邊務數十事多見納丙寅從廷推徵詣京師拜都察院右僉都御史巡撫四川討松潘番受命卽行甫踰月而入境申嚴軍法簡練器械築關堡城池六十四所哨臺

三百七十有餘乃進攻賊寨擒渠魁送京師斬之羣番懾伏獻甲盛刀劒三千餘件良馬四百餘匹陞左副都御史以母老乞歸養上不許景泰辛未召還番人請留者凡十有七奏入都勞以羊酒獎諭甚至尋命提督遼東軍務中貴武臣皆以毋撓寇公鋒相戒其屬癸酉海賊李福作亂深遣都指揮周英捕獲千餘入而械其酋二十餘人送京師餘盡釋之甲戌俺答人寇深督師拒剿獲敵首七十餘級馬六百餘匹復上章乞養不許丙子召還京議事復固請歸省時母年九十四感風疾深抵家母乃語曰得覩汝死無憾矣乃卒詔奪情起深三疏辭不允天順改元始獲請終制再起左都御史率臺臣劾曹欽縱恣不法事庚辰秋七月二日欽謀不軌遣黨害深于朝房時年六十有九

贈少保謚壯愍子林太學生持喪歸葬

明錢溥寇

孫慶字吉安安州人永樂戊戌進士知山西興縣尋改山東濟陽開荒田招流移德化大行擢陝西道監察御史論列無所迴避正統己巳隨駕北征遇難死之初議北狩慶上疏力陳不可狀及被敵圍舉朝服其先見景泰二年賜勅褒贈廕一子廣入

太學祀鄉賢

安州志

樊忠安州人少有勇力選充護衛將軍正統十四年土木之變上被圍太監王振猶與上對弈忠以所持金瓜捶振死乃護駕突圍捶死百餘人力屈死於陣墓在板橋村

安州志

段棗強完縣人正德七年流賊犯完縣知縣杜珣率民固守棗強糾敢死士數人夜劫賊營死

舊志

傳誼蠡縣人正德辛未流寇竄擾誼與生員段繼祖湯詢宋民人韓宗信等率眾拒守城破巷戰俱歿有司爲建祠以祀

蠡縣志

李森祁州人正德辛未寇至被擄死之

祁州志

鄭秀幼有膂力正德辛未率眾禦寇發矢斃賊數人賊盡力環攻眾潰秀獨力戰死之

同上

李涑容城人由世廕爲保定後衛指揮僉事歷官山西甯武關總兵嘉靖中邊騎數萬入境巡撫趙時春親擊之遇伏涑血戰脫時春而自與長子松及遊擊李桂等皆死於八角大蟲嶺贈少保左都督諡忠愍松贈指揮同知

雍正通志

劉秉仁唐縣人嘉靖時由貢生任建昌府檢校值流賊犯境戰沒於陣贈大僕丞廕一子入監

舊志

楊繼盛字仲芳容城人七歲失母庶母妬使牧牛繼盛經里塾覩里中兒讀書心好之因語兄請得從塾師讀兄曰若幼何學繼盛曰幼者任牧牛乃不任學耶兄言於父聽之學然牧不廢

也年十三歲始得從師學家貧益自刻勵舉鄉試卒業國子監徐階亟賞之嘉靖二十六年登進士授南京吏部主事從尙書韓邦奇遊覃思律呂之學手製十二律吹之聲畢和邦奇大喜盡以所學授之繼盛名益著召改兵部員外郎俺答躡京師咸甯侯仇鸞以勤王故有寵帝命鸞爲大將軍倚以辦寇鸞中情怯畏寇甚方請開互市市馬冀與俺答媾幸無戰鬪固恩寵繼盛以爲讎恥未雪遽議和示弱大辱國乃奏言十不可五謬疏入帝心動下鸞及成國公朱希忠大學士嚴嵩徐階呂本兵部尙書趙錦侍郎聶豹張時徹議鸞攘臂詈曰豎子目不睹寇宜其易之諸大臣遂言遣官已行勢難中止帝向猶豫鸞復進密疏乃下繼盛詔獄貶狄道典史地雜番俗罕知詩書繼盛簡子弟秀者百餘人聘三經師教之鬻所乘馬出婦服裝飭市田資

諸生縣有煤山爲番人所據民仰薪二百里外繼盛召番人諭之咸服曰楊公卽須我曹穹帳亦舍之況煤山耶番民信愛之呼曰楊父已而俺答數敗約入寇鸞奸大露疽發背死戮其屍帝乃思繼盛言稍遷諸城知縣月餘調南京戶部主事三日遷刑部員外郎當是時嚴嵩最用事恨鸞凌已心善繼盛首攻鸞欲驟貴之復改兵部武選司而繼盛惡嵩甚於鸞且念謫籍一歲四遷官思所以報國抵任甫一月草奏劾嵩十罪五奸疏入帝已怒嵩見召問二王語喜謂可指此爲罪密構於帝帝益大怒下繼盛詔獄詰何故引二王繼盛曰非二王誰不懾嵩者獄上乃杖之百令刑部定罪侍郎王學益嵩黨也受嵩屬欲坐詐傳親王令旨律絞郎中史朝賓持之嵩怒謫之外於是尙書何鼂不敢違竟如嵩指成獄然帝猶未欲殺之也繫三載有爲營

救於嵩者其黨胡植鄢懋卿忱之曰公不覩養虎者耶將自貽
患嵩領之會都御史張經李天寵坐大辟嵩揣帝意必殺二人
比秋審因附繼盛名並奏得報其妻張氏伏闕上書願代夫誅
嵩屏不奏遂以三十四年十月朔棄西市年四十臨刑賦詩曰
浩氣還太虛丹心照千古生平未報恩留作忠魂補天下相與
涕泣傳頌之初繼盛之將杖也或遺之蜉蝣膽卻之曰椒山自
有膽何蜉蝣蛇爲椒山繼盛別號也及入獄創甚夜半而蘇碎瓷
盃手割腐肉肉盡筋挂膜復手截去獄卒執燈顫欲墜繼盛意
自如朝審時觀者塞衢皆歎息有泣下者後七年嵩敗穆宗立
卹直諫諸臣以繼盛爲首贈太常少卿諡忠愍予葬祭任一子
官已又從御史郝杰言建祠保定名旌忠

明史

韓東明安州人萬厯壬子舉人知邠州城陷整衣冠北向拜赴

井死

陝西通志

國朝賜諡節愍

勝朝殉節錄

王行健蠡縣人萬厯己未進士授戶部主事巡倉督廠管庫權

關凡四奉命節羨金二萬有奇乞養歸臺省交薦不出己巳城

破與子奎光同遇難有父忠子孝之褒祀鄉賢祠

舊志

田毓齡字春裔安肅人舉人授遵化縣教諭己巳十月城陷死

之

安肅縣志

王喬棟字弱侯雄縣人天啟乙丑進士知朝邑縣魏中賢黨坐

縣人王之案贓下喬棟嚴徵喬棟不忍封印於庫而去巡撫怒

欲劾之士民擁署號呼乃止其官朝邑時蓋僅期年耳忠賢伏

誅起順天教授

雄縣志

累遷湖廣參政

明史

楚大中亂司道多不之

官喬棟兼綰七印督餉至興國州李白成率眾大至喬棟且守